

Stichting BOB Aruba a presenta plan di accion pa gobernador



ORANJESTAD - Stichting BOB Aruba, e fundacion cu ta promove chequeo regular di hende muhe pa detecta cancer di pecho mas trempan posibel, a haci un bishita na gobernador Fredis Refunjol. Durante e encuentro e fundacion tambe a presenta nan plan di accion. Gobernador di Aruba semper ta informa su mes di e desaroyonan riba e isla y bishitanan manera esun di BOB ta forma parti di e proceso aki. E fundacion ta relativamente nobo, funda na october 2012 pa conscientisa e comunidad, particularmente hende muhe, di e importancia di deteccion di cancer di pecho den un fase mas trempan pa minimalisa e efecto negativo di e malesa pa e persona. Nan ta promove screening regular di hende muhe entre e edad di

45 -75 aña.

Aña pasa na mei Lio Capriles (di banco MCB/CMB) a haci un donacion personal di un mey miyon florin. Cu e placa aki e fundacion por a compra un aparato pa saca mamografia, un deseo pa locual BOB tabata recauda fondo for di e momento cu nan a cuminsa cu e fundacion. Pero ainda falta placa, un suma igual cu esun di e donacion entre otro pa promocion, especialista necesario pa opera e aparato. Cu e aparato nan kier haci un chequeo dentro dos aña di 20.000 hende muhe. Pa logra a lo menos 10.000 hende muhe den un aña e fundacion mester conscientisa e hende muhe prome. Pasobra tin hopi cu no sa kico ta un mamografia of nan tin miedo di e resultado. Mas caso di cancer di pecho



Detecta e cancer aki den un fase mas trempan ta un meta importante pa e fundacion pero tambe conscientisa e hende muhe di e causa di cancer di pecho pa preveni cu nan lo haya e malesa aki. Cancer di cuero ta e cancer mas frecuente bou hende muhe y homber, pero bou hende muhe cancer di pecho ta sali number dos. Y segun ultimo cifra e cantidad ainda ta crece. Tur aña tin un av-

erahe di 80 hende muhe cu ta haya e diagnosis di cancer di pecho. Mayoría ta entre 45 y 80 aña, pero e grupo cu tin mas o menos 40, tambe ta creciendo. Bon Dia Aruba no a logra di haya e plan di accion di BOB. E gobernador si tin'e y segun e fundacion a keda "hopi entusiasmo cu tur loka e a tende". "Tambe sr. Refunjol lo bay sigui tene su mes na haltura di e progreso di e fundacion aki y lo yuda te

na unda cu por", BOB a laga sa. Ariba e potretnan por mira miembronan di directiva, sra. Idelle Orman, representando Mary Joan Foundation, sra. Enrita Werleman, co fundadora y office manager, sra. Vanessa Williams, presidente, sr. gobernador Fredis Refunjol, sra. Fayona Flanegin, vice presidente y representando KWF, Dr. Rose-Ann Anthony, tesorero y miembro sra. Edwina de Cuba. □